

四庫全書

史部

欽定四庫全書

平定準噶爾方略續編卷十二

乾隆二十六年六月壬申

命陞叙解送羊隻之叅領范時綬等

上諭軍機大臣曰阿桂奏范時綬由烏魯木齊送羊

一萬三千隻全抵伊犁辦理妥協又懇于辦送回

空駝隻後仍來伊犁効力等語范時綬前因解送

阿克蘇羊隻妥協曾賞給叅領職銜此次更屬奮

勉着加恩授為頭等侍衛烏魯木齊亦有應辦事
務仍在原處行走不必又往伊犁其在事官員着
交部議叙兵丁等賞給錢糧一月

甲戌

申諭叅贊大臣阿桂等曉示哈薩克貿易人等

上諭軍機大臣曰成袞扎布奏驍騎校博達勒等護
送哈薩克使人行抵邊境見上年在特穆爾綽爾
郭等處過冬之哈薩克等俱遠移游牧殊屬恭順

歸途遇哈薩克等告稱前有二十人打牲至和博克等處被賊戕害等語近經烏魯木齊大臣等奏哈薩克貿易人等告稱伊等二十餘人被害恐係內地逃人所為朕即降旨將來貿易人等若再行言及即告以內地並無逃人明係厄魯特嗎哈沁其言語衣服與內地大不相同嗣後爾等若再與相遇即行勦殺果係內地逃人亦即擒拏但不得驚動往來商旅可將此徧行傳諭知之

丙子

命優卹索倫副總管尼卜齊喀

上諭軍機大臣曰索倫副總管尼卜齊喀曾于軍前奮勉効力今在英噶薩爾病故着加恩賞給恩騎尉准伊子承襲一次仍賞銀一百兩

叅贊大臣舒赫德等疏奏籌議回城保甲事宜舒赫德等奏言准軍機處咨稱本處議奏葉爾羌辦事都統新柱等請將回部各城照哈密吐

魯番例編設保甲稽查匪類一摺查回部甫經
平定辦理要貴不煩從前哈密吐魯番等處編
設保甲既無案可稽而內地新疆情形亦異請
行文舒赫德與新柱額敏和卓會同具奏得

旨俞允臣等會議得哈密吐魯番皆仿內地之例十
家設一甲長巡緝稽察甚為有益但該二處設
官分職皆與旗民相似至回部各伯克凡一切
事務俱係分員專管尚屬嚴密若改編保甲勢

必裁汰舊缺轉覺紛更且伯克等不得其人則保甲亦屬具文應請仍照舊制責成阿奇木伯克等將各村莊頭目遴選補授即如各村莊之噶雜納齊一缺管轄地方甚為緊要倘有疎防故縱等情即行革退分別查處或地方遼濶即酌量添設該管大臣等仍與阿奇木不時巡察自足戢奸宄而安善良奏入

上從之

戊寅

諭叅贊大臣舒赫德訪查波羅泥都潛瘞處所

上諭軍機大臣曰舒赫德奏稱詢問回人台里卜和

卓據稱波羅泥都有子薩木薩克係阿里雅斯之

妻乳哺阿里雅斯潛盜波羅泥都屍體逃往伊木

瑪拉袞圖斯等處昨據海明已查出波羅泥都幼

子薩木薩克今又有同名之人應行詳察等語海

明前奏波羅泥都逃走時將伊子交伯什克勒木

之密喇卜養育今據台里卜和卓所稱則係阿里雅斯並將屍骸盜去看來此次所奏較實但前次查出之薩木薩克業已解京若再行搜訪恐回人轉生疑懼且伊等雖稱盜屍逃走而喀什噶爾乃其先壟或潛行埋瘞並將伊子帶回亦未可定此時不必張皇辦理惟在伊等先壟附近處所伺間巡察或向微末回人等詢問尚可得其實情着傳諭舒赫德留意訪查永貴至日即將情節告知令

其循照辦理

壬午

諭定邊左副將軍成袞扎布等辦理嗎哈沁各事宜
上諭軍機大臣曰成袞扎布奏據護送哈薩克使人
之喀爾喀兵朋楚克告稱哈薩克使人卓勒巴喇
斯已回游牧我等歸途於五月十二日在薩里山
陰之鑑格爾烏里雅蘇圖遇五十餘賊鎗傷官兵
梅楞達什敦多卜巴圖致斃惟我一人脫出等語

昨阿桂奏伊柱於四月初八日在巴柴拏獲瑪哈沁數口據供同行之塞卜騰被大兵擊敗欲入俄羅斯今又移向阿勒坦特卜什伊柱即領兵往剿或此次賊人即塞卜騰黨類亦未可定成衮扎布已派兵三百令車木楚克扎布等前往搜捕並着傳諭阿桂轉飭伊柱加意奮勉一經拏獲即將朋楚克所告情節詳加查詢再朋楚克等告稱因駝隻疲瘦向哈薩克換取肥者並未給與等語伊等

係微小部落原欲沾我餘潤轉向彼希圖便益甚
屬見小嗣後護送哈薩克使人等當擇能知大體
者派往再於乾清門行走之察哈爾侍衛等派出
二三員令其照看着軍機大臣即查辦具奏

癸未

諭貝子品級公額爾克沙喇等查拏嗎哈沁事宜
上諭軍機大臣曰成袞扎布等奏護送哈薩克使人
官兵等歸途遇嗎哈沁五十餘人被其戕害等語

現在額爾克沙喇等解送伊犁牲隻在途伊等領
兵行走諒不致疎虞但得聞信息順便查拏安知
不就擒獲成衮扎布會知會與否未經奏及着傳
諭額爾克沙喇扎布禪等此次嗎哈沁傷損官兵
信息伊等曾否聞知牲隻在途仍須加意防範過
有嗎哈沁等即查拏訊究據實奏聞

議派出侍衛照看外藩使人事宜

軍機大臣奏言臣等欽奉

諭旨嗣後照看哈薩克使人派出乾清門侍衛等查
哈薩克等部落若遣使前來將軍大臣自必先
行奏報迨入

覲回京亦需時日自可從容辦裝並令其送至該部
落游牧若係來見將軍大臣即行轉回之使人
等則一經奏報即派侍衛等馳驛前往亦可無
悞奏入報

聞

叅贊大臣阿桂等奏報催調續到屯田回人協
助收割事宜

阿桂奏言伊犁屯田回人一千戶現有八百戶
餘二百戶原議秋收後送到今阿奇木公木薩
同衆伯克告稱本年春夏田功甚好必獲豐收
請將回人二百戶於六月盡送來伊犁以助收
割情願捐給口糧至秋收後再支官項等語臣
即行文阿克蘇庫車等處大臣速為派送祇需

給以行糧農具其坐糧籽種俱于伊犁辦給奏
入報

聞

甲申

獎諭叅贊大臣阿桂並追擒賊首塞卜騰事宜

上諭軍機大臣曰阿桂奏伊犁領兵往捕嗎哈沁塞
卜騰等至五月初尚未得信息伊犁起程時曾飭
以窮追務獲此時必奮往搜覓所帶一月口糧應

速為接濟已派侍衛鄂鐸等領兵七十名前往等語阿桂此次辦事奮勉妥協深屬可嘉計伊柱此時已擒獲塞卜騰等矣若臨陣勦殺賊首則已否即負創亦必派員解京又搶掠護送哈薩克使人官兵等或即係塞卜騰一起擒獲時著詳訊具奏朕因嘉悅阿桂親製詩章書笺以賜嗣後宜益加意奮勉

乙酉

申諭定邊左副將軍成袞扎布等慎選護送哈薩克
使人兵丁

上諭軍機大臣曰成袞扎布等奏據派送哈薩克使
人被嗎哈沁搶掠脫出之兵丁多爾濟所告與朋
楚克不符其哈薩克不肯易換馬駝情節俱係捏
造等語派送外藩使人即兵丁亦當擇其強幹曉
事者似此鄙瑣見小之人濫行充數乃成袞扎布
等識見不到之處已諭此後特派乾清門侍衛等

直送至邊界成衮扎布處派官兵隨往亦宜加意
遴選毋得仍前濫派

議展拓卡倫遷移臺站事宜

軍機大臣奏言安泰等奏成衮扎布等以伊犁
回部平定中外一家請將奈曼明安至度濟察
罕布爾噶蘇所設卡倫展至烏魯木齊駐劄派
喀爾喀公朗衮扎卜烏梁海內大臣察達克等
查勘今據呈稱自巴顏珠爾克卡倫至烏拉克

沁伯勒齊爾及烏魯木齊可設卡倫者十五處
俱以相隔百里為率臣等會議自烏魯木齊至
烏爾圖布拉克賽音塔喇納里特吉木薩四卡
倫由烏魯木齊派出官兵馬匹牲隻接續駐劄
其蘇伯昂阿至烏拉克沁伯勒齊爾十一卡倫
交成衮扎布覆查如水草俱佳即將奈曼明安
等十六卡倫遷移駐劄所需錢糧等項從前俱
由烏里雅蘇台支領但現在道路既遠而烏魯

木齊積貯甚豐應酌量於兩處就近分領等語
臣等議得新經查勘展拓之十五處既可安設
卡倫應將奈曼明安等舊卡倫遷移但千里長
途喀爾喀難于全管應請將附近烏魯木齊四
卡倫派出索倫綠旗等兵駐劄從阿克蘇添侍
衛二員管領其餘十一卡倫令就近分領錢糧
之處應如所奏辦理又查近據成衮扎布奏烏
里雅蘇台至烏魯木齊既經新設臺站十八處

將遞送西路一應事件俱由烏魯木齊分發其薩拉布拉克巴里坤所設臺站二十四處俱行裁撤其新設之十八處每站除章京外派兵八名仍派台吉管理是官兵不必增添錢糧亦無多費而卡倫外展地方寬濶扎哈沁喀爾喀烏梁海等游牧饒裕咸荷

皇仁遠被矣奏入

上從之

辛卯

議烏魯木齊等處餘糧折價事宜

軍機大臣奏言據安泰奏稱欽奉

諭旨烏魯木齊等處屯田餘糧不必解送巴里坤酌
量減價折給兵丁扣抵鹽菜銀兩查官收米麩減
價折銀自屬兵丁所願但食用不盡者必籌轉
售之法今烏魯木齊有商人二三百名曾有以
貨物易換兵丁米麩之事若令其交銀現買似

亦可行酌將兵糧一石定價九錢每次給與五斗扣銀四錢五分至商人則較兵丁加增酌令交銀一兩五六錢給糧一石較時價尚屬減省等語查從前書山等以庫車沙雅爾糧石有餘曾議減價折給兵丁今安泰等所奏事同一體至折給所領銀兩之半更使兵丁日用有資應如所奏辦理其商人內如有願交銀市買米麩者亦照時價稍為減折將來烏里雅蘇台一路

安設臺站商民聚集再為隨時辦理仍將折售
各數咨明陝甘總督奏銷奏入

上從之

壬辰

命押解革職原任阿奇木總管阿卜都賚來京

上諭軍機大臣曰永貴奏稱審訊阿卜都賚刑逼多
倫回人什物信用親戚瑪穆爾縱令侵漁請旨革
職治罪又瑪穆爾曾隨波羅泥都逃走請即行正

法等語阿卜都賚係久居吐魯番之人加恩令其
管理多倫回衆理宜正已率下乃貪酷敗檢若此
不可留于回地着傳諭納世通等派員押解來京
助惡之瑪穆爾着即行正法其妻子着發往伊犁
賞給厄魯特等

甲午

命以布魯特烏默爾比家口仍賞給阿瓦勒比等

上諭軍機大臣曰舒赫德奏稱冲噶巴什之布魯特

烏默爾比搶掠安集延貿易人等業經治罪其家屬八名口請分賞各城阿奇木伯克等語烏默爾比係恩賞游牧在卡倫附近安插之人仍不改舊習肆行搶掠應照所奏將家口分賞各城伯克為奴但阿瓦勒比聞知烏默爾比不法即行呈報甚屬恭順哈爾噶齊從前亦著有勞績着加恩免其分賞回部伯克即賞給阿瓦勒比等此係格外施恩若該部落人等再有似此不法者斷不姑貸着

舒赫德等徧行傳諭衆布魯特知之

秋七月丁酉朔

命酌辦駐劄官兵口糧羊隻

上諭軍機大臣曰五吉等奏稱阿克蘇大臣咨取食
羊八千五百隻已派官兵解送但羊隻原係辦給
各城滿洲官兵若將所有官兵一概支給四個月
口糧羊隻既非伊等素習轉使米麵陳陳相因又
虛糜購辦之費等語所奏甚是凡辦理庶務須斟

酌時宜從前曾諭支放各城官兵口糧惟滿洲兵於一年之內酌給四個月羊隻而海明等仍籠統奏請又據軍機大臣議如購辦羊隻有餘將綠旗官兵酌給一兩月亦可不足則已今五吉海明皆新疆辦事大員而所見之明昧不同若此海明能無愧乎著將五吉奏摺錄寄各處大臣閱看嗣後即遵照辦理

己亥

諭按察使納世通等辦理哈喇沙爾堤工

上諭軍機大臣曰納世通奏本年五月哈喇沙爾河水忽長三尺流至城下已將屯田處所築堤二千四百餘丈親赴督率防護幸保無虞等語堤工為屯田要務辦事大臣等自應親往查勘以時修築今派達桑阿往代納世通伊初至新疆恐未能熟諳情形著傳諭納世通將屯田水利事宜細為達桑阿指授此次被水田畝或係官地抑係回人產

業俱著勅明具奏

甲辰

諭參贊大臣阿桂等搜捕嗎哈沁各事宜

上諭軍機大臣曰阿桂奏稱伊柱領兵追勦嗎哈沁
塞卜騰等行至和博克薩里鏗格勒克因馬乏暫
回此等嗎哈沁雖有投入俄羅斯之勢或于額爾
齊斯附近山僻藏匿亦未可定擬于七月親往搜
捕卽巡查哈薩克邊界等語嗎哈沁等雖非要犯

但情甚可惡昨將護送哈薩克使人之喀爾喀兵
丁朋楚克等搶掠即此等黨類阿桂雖領兵前往
但伊等出入無定必兩路夾攻方不致逃脫成衮
扎布已派車木楚克扎布前往可即知會令其速
至額爾齊斯與阿桂會合窮追務獲再據捉生詢
問供稱塞卜騰等上年曾搶掠哈薩克二十人等
語從前哈薩克亦經稟告並著成衮扎布等以前
項情節曉示哈薩克等知之又

諭曰阿桂參奏護軍參領蘇尼勒圖二等侍衛烏魯木等詢知塞卜騰在阿勒坦特卜什藏匿自應即行掩襲乃僅將嗎哈沁鄂里克等夥黨擒獲即逗遛不進請將蘇尼勒圖降為副叅領烏魯木降為三等侍衛仍令其隨營効力以觀後效等語蘇尼勒圖著革職令其自備資斧効力贖罪烏魯木係厄魯特人未諳軍紀昨因伊擒獲嗎哈沁博卓壘等曾授為頭等侍衛阿桂若已得旨即加恩曲宥

或得旨而尚未傳諭則令伊仍以二等侍衛効力行走並將叅奏得旨情節曉諭知之又

諭曰此次搜勦嗎哈沁隨侍衛翹蘇爾之索倫馬甲額爾德木圖臨陣得傷仍射殺一賊奮勉可嘉著加恩授為驍騎校賞戴藍翎賜號哈坦巴圖魯仍賞銀一百兩馬甲鄂勒椿巴扎爾著阿桂酌量獎賞翹蘇爾亦頗著勞績著賞緞二端

庚戌

議新疆經費事宜

軍機大臣奏言臣等遵

旨查得平定準噶爾回部後凡陝甘等處經費應行
裁減之項上年楊應琚來京與臣等會議具奏
凡所裁之綠旗兵及已撤臺站項下共節省銀
五十三萬餘兩今楊應琚奏請將陝甘滿漢營
馬每年於三四月收放又可節省銀九萬餘兩
共銀六十二萬兩有奇近經臣等查奏伊犁葉

爾羌等處大臣等養廉官兵鹽菜銀兩以徵收
錢糧折給外每年尚需銀十五六萬兩即於陝
甘節省項下動撥尚餘銀四十六七萬兩謹將
節省及支給各數繕單恭呈

御覽奏入報

聞

辛亥

議遷移威魯堡回人事宜

軍機大臣奏言據舒赫德等奏稱威魯堡回人擬于八月內遷居吐魯番查附近闢展之連木齊木現有栽屯熟地六千畝闢展洋赫兩處俱有熟地一千餘畝應令千戶瑚如拉領前往住魯克察克之回衆住連木齊木百戶伊明和卓領前往闢展之回衆仍居舊地按戶撥給地畝如尚不敷仍有近水之地可以開墾請將瑚如拉義明和卓俱授為五品伯克將回衆公舉之瑪

瑪古爾班呼岱巴爾氏授為六品副伯克各居
分地管轄回衆其量輸租稅俟成熟後酌定陞
科奏入

上從之

丙辰

諭定邊左副將軍成衮扎布等偵探進勦嗎哈沁塞
卜騰等確信

上諭軍機大臣曰成衮扎布等奏稱護送哈薩克使

人卓勒巴喇斯等之驍騎校納爾賽等回至鏗格爾遇嗎哈沁百餘人為首者名塞卜騰將伊等掠至薩里山得脫等語昨據阿桂奏領兵往阿爾齊斯搜勦塞卜騰朕即謂從前搶掠朋楚克者皆其黨類曾諭車木楚克扎布領兵會同阿桂兩路夾攻今又搶掠納爾賽等情甚可惡今納爾賽等既知嗎哈沁等藏匿處所願為嚮導著傳諭成衮扎布等將從前所諭車木楚克扎布之旨於何時發

往伊等現在何處不時探聽一得實信作速奏聞
諭葉爾羌辦事都統新柱等辦理外藩入貢事宜
上諭軍機大臣曰新柱奏謙珠特伯克黑斯婁遣伊
子貢金隨酌量賞給又據告稱伯克訥格爾吉勒
梯亦願附進土物等語外藩小部落輸誠入貢固
不當較其貢物之厚薄但必親身前來或遣其子
弟始足以昭忱悃若僅遣使人即當酌量辦理至
訥格爾等與黑斯婁一體乃懇其代進將來行之

日久便成黑斯婁之屬人矣此風斷不可長嗣後
若有逸人附進者非但不加賞賚亦不必收受著
傳諭新柱等知之

已未

議疏通錢法事宜

叅贊大臣舒赫德奏言阿克蘇等處鼓鑄錢文
令回人等交納銅觔原非常賦一俟錢法流通
即行停止與葉爾羌等處一體抽收錢文始為

定制臣愚請將阿克蘇等處鑄得之七千餘騰格以四分存公六分派給回人數月後再將存公錢文折給官兵鹽菜銀兩俟來春將回人所得錢文於十分內抽回二分續鑄之錢亦照此辦理再拜城出產銅觔處所業經奏設採銅伯克請交各城大臣酌照辦理奏入得

旨軍機大臣議奏尋議鼓鑄錢文宜派給回人行使日久自見流通若僅折抵官兵鹽菜銀兩則回

人等並無向官兵市物之事即以緞布收錢亦屬有限恐錢法壅滯且抽收回人租稅以錢折價亦必先行給發始可上下通行應如所奏辦理將來陸續鑄得錢文即可源源接濟至增派採銅伯克等事既經行文各城應俟該大臣等酌量情形具奏到日再行籌議奏入

上從之

庚申

命飭禁北路商販與哈薩克貿易

上諭軍機大臣曰阿桂奏現在喀爾喀烏梁海等展拓游牧若哈薩克等由塔爾巴噶台至新設卡倫甚為徑直倘與北路商販等貿易則伊犁烏魯木齊等處難于得馬應豫為禁約等語所奏甚是外藩貿易一事原應官為經理若聽其與北路商販往來則新疆難得馬匹而伊等債負爭鬪之釁皆從此起可傳諭成衮扎布行文各駐劄大臣扎薩

克及卡倫侍衛台吉等嚴禁私向哈薩克貿易即
哈薩克等以牲隻前來卡倫人等當告以本處游
牧頗饒不必貿易遣令轉回該大臣等仍不時巡
察如有不肖之徒私行貿易者一經察出即從重
治罪並將侍衛台吉等參奏亦傳諭阿桂知之

議瑪納斯等處駐兵屯田事宜

叅贊大臣阿桂等奏言查伊犁烏魯木齊之間
有瑪納斯庫爾哈喇烏蘇晶河三處安設村莊

駐兵屯田原以省額林哈畢爾噶一路臺站輓
運口糧之力續經安泰等議以一時難于盡舉
暫停安設臺站瑪納斯距昌吉吉羅克倫不遠酌
派屯田兵二百名庫爾喀喇烏蘇晶河距伊犁
烏魯木齊俱遠每村派兵三百名人各墾地十
五畝所需籽種農具駝隻由烏魯木齊巴里坤
取用其分駐馬兵五百名請以范時綬管轄又
查烏魯木齊至伊犁共安設二十一臺每臺馬

兵五名人給馬二匹綠旗兵十五名人給馬一匹每臺駝四隻晶河以西歸伊犁管轄托多克以東歸烏魯木齊管轄奏入得

旨軍機大臣議奏尋議前據安泰等奏請瑪納斯等處駐防屯田臣等議以設立三村莊應分年酌辦今阿桂等議駐防兵丁較原奏一村五百名之數三分減二則一年內即可盡舉而屯兵八百名之收獲已足敷臺站口糧之用且距伊犁

烏魯木齊不遠自可無虞其令伊犁烏魯木齊就近分管及派給馬匹籽糧農具並將三村事務委范時綬總管俱應如所奏辦理奏入

上從之

癸亥

陝甘總督楊應琚疏奏安西等屬豌豆豐收情形

楊應琚奏言查豆石為飼秣要需安西氣寒且

豆種甚少就近並無出產自新疆平定糧運俱停惟歲需豆石仍支本色今春飭令該府縣等給發倉貯盈餘及時試種悉皆成熟各處收成統計八分以上農民等感戴

恩旨將本年額糧全行蠲免情願以所穫豆石抵還春借籽種小麥豆麥兼收可得豌豆數千石是來歲安西以西豆石即可就近供支以省內地採買輓運之煩奏入報

聞

甲子

命更調哈密巴里坤辦事大員

上諭軍機大臣曰三寶著以道銜前往哈密辦事其直隸布政使員缺著觀音保補授同德在巴里坤辦事已經數載於採買羊隻等事俱辦理妥協著補授貴州按察使永寧著以侍郎銜前往巴里坤辦事同德俟交代後再行來京

乙丑

授原任按察使夔舒為戶部員外郎

上諭軍機大臣曰永貴等奏稱阿克蘓以司員銜行走之夔舒隨印辦事俱能實心奮勉已經三載尚係虛銜等語夔舒因按察使任內辦理案件錯謬革職發往北路軍臺効力續以司員在回部辦事

既知黽勉著加恩授為戶部員外郎遇缺即補

命陞用都司陳堯典等

上諭軍機大臣曰永貴奏稱都司陳堯典隨印前鋒
固林泰馬甲高士綿辦事俱屬黽勉等語前經舒
赫德永貴將陳堯典等保題已命分別陞用今尚
在候補陳堯典著加恩賞擊遊擊頂帶遇各省有
遊擊缺出即行補授固林泰高世綿著交部以筆
帖式即用又

諭曰守備觀虎以解送火藥留烏什駐防二年餘甚
屬奮勉著加恩以應陞之缺即補仍留該處辦事

丙寅

葉爾羌辦事都統新柱等疏奏巴勒提部落貿

易情形

新柱等奏言六月初六日庫克雅爾卡倫送到
巴勒提部落頭目烏蘇完遣使愛哈瑪持至葉
爾羌臣等接見呈獻書儀係帶領商人前來貿
易臣等因伊部落上年屢經遣使恭順誠切加
以撫慰仍飭該伯克等將貨物查看照例收稅

俟事竣回程仍以書儀相答謹將原書繙譯並
臣等復書稿本進呈

御覽奏入報

聞

平定準噶爾方略續編卷十二

欽定四庫全書

平定準噶爾方略續編卷十三

乾隆二十六年八月庚午

諭參贊大臣阿桂等速奏追捕塞卜騰情形

上諭軍機大臣曰阿桂奏稱詢問從哈薩克來投之

厄魯特等據供伊等係輝特屬人為塞卜騰所擒

中途拋棄今塞卜騰已入俄羅斯等語所奏殊未

明晰昨據阿桂奏伊柱未曾追及塞卜騰伊親領

官兵於七月初旬前往額爾齊斯等處搜捕此時
曾否起程何以未見奏及今塞卜騰等已入俄羅
斯諒阿桂等必速往追索著傳諭阿桂嗣後辦理
一切事件務宜明白具奏不可稍有含混仍將現
在辦理情形作速奏聞

辛未

諭御前侍衛副都統安泰等籌議烏魯木齊等處屯

田事宜

上諭軍機大臣曰安泰等奏烏魯木齊現在屯田五處所收穀石甚屬充裕折給官兵願領者少查該處屯田有綠旗兵三千名請以二千差操一千屯田互相更換等語烏魯木齊收獲穀石雖盈餘甚多支用處少但僅以千人屯田則官兵已墾之地又必荒蕪甚屬可惜若不通融籌畫穀石陳陳相因必致朽腐因思該處兵丁俱係三年一換並未挈眷若聽兵丁等移家居住或內地游民有願往

立業者令楊應琚查辦酌給田畝籽種安插似有裨益即不便如此辦理與其將伊等撤回內地不若就近移往伊犁屯田著傳諭安泰阿桂楊應琚等相度情形妥協酌議再著軍機大臣議奏昨派旌額理阿思哈往代安泰定長今既辦理此事安泰等著在該處仍留數月俟定議具奏後即起程來京

癸酉

命道負蘇凌阿協辦哈喇沙爾事務

上諭軍機大臣曰昨因納世通在哈喇沙爾年久派
達桑阿前往更換但達桑阿係初辦回部事務恐
未能熟悉現在闢展有德爾格等辦事著道負蘇
凌阿前往哈喇沙爾協辦

命賞郡王額敏和卓第三子鄂羅木咱卜二品頂帶
孔雀翎

上諭軍機大臣曰額敏和卓數年辦事軍前伊長子

素賚瑞次子木薩俱承辦公事其吐魯番等處事務係伊第三子鄂羅木咱卜管理今據永貴奏伊辦理游牧約束屬人俱甚妥協著加恩賞戴二品頂帶孔雀翎以示鼓勵

丙子

參贊大臣阿桂等疏奏伊犁二麥豐收

阿桂等奏言伊犁屯田兵八百名每人種大小麥十畝新舊回人八百戶每戶給麥種一石茲

於六月二十內外二麥皆熟兵丁所種約計二十分
以上可得麥一萬六千石回人每種一石除口糧及來年籽種外應交大小麥十石約可得八千石俟全行收獲得有細數及粟黍收成時再行請

旨加恩鼓勵此皆

聖主洪福

上蒼默佑得以雨暘時若百穀用成臣等不勝慶幸奏

入得

旨覽奏欣慰下部知之

戊寅

議鑄給阿奇木伯克等圖記事宜

左都御史永貴奏言管轄葉爾羌等城回人頭目俱有銅石小圖記今回部蕩平所設阿奇木等伯克俱照內地官制分定品級賞給頂翎辦事大臣等鑄給印信其阿奇木等不便仍用私

刻圖記請照各邊省土司之例一體給與印記
以昭信守奏入得

旨軍機大臣議奏尋議回部葉爾羌等城新入版圖
辦事大臣俱已鑄給印信其阿奇木等伯克自
應一律鑄給圖記凡有公事文移該阿奇木等
應同伊沙噶噶雜納齊等伯克署名鈐用但圖
記式樣宜加酌定以別等威臣等謹擬將阿奇
木等圖記較辦事大臣等印信減小分寸其葉

爾羌等處阿奇木伯克向來統轄小城今一體
俱為

天朝臣僕但品級不同自應量為區別查回部設立
阿奇木共三十一城計其大小酌為三等葉爾
羌喀什噶爾阿克蘇和闐為四大城烏什英噶
薩爾庫車闢展為四中城沙雅爾賽里木拜庫
爾勒玉古爾牌租阿巴特塔什巴里克哈喇哈
什克勒底雅玉隴哈什齊爾拉塔克阿斯騰阿

喇圖什阿喇古玉斯騰阿爾圖什英額齊盤巴
爾楚克沙爾呼勒魯克察克托克三喀喇和卓
洋赫克勒品為二十三小城俱給與阿奇木伯
克圖記其大城圖記分寸視內地佐領中小等
城以次遞減謹擬定字樣恭候

欽定交該部照例鑄給奏入

上從之

辛巳

議移駐巴里坤等處官兵事宜

軍機大臣奏言據侍郎五吉奏巴里坤有屯田
綠旗兵一千名雖經墾種而地寒霜早僅收青
稞一種故屯田兵亦照駐防例支領鹽菜銀兩
兼以粟麥共需銀五萬二千三百兩有奇安西
兵丁三千餘名計日遷移俱係折給糧價更不
需支食青稞是此項屯田兵丁竟可撤回交總
督楊應琚將安西兵派出屯田以節冗食等語

又據陝甘總督楊應琚奏撤回巴里坤屯田兵
丁派安西兵五百名屯田事宜曾商之提督劉
順今五吉所奏相符又查巴里坤遣犯四百八
十餘名若給與口糧同安西兵屯田亦即敷用
再巴里坤地氣雖寒上年曾飭屯田官負試種
豌豆一千畝亦皆成熟若以人力糞治並可種
麥等語臣等伏查巴里坤屯田所收青稞僅萬
餘石兵丁等既不能全行支食今安西兵又移

往該處則所支銀兩米麩尤多即云試種豌豆
有收亦未必常年如舊且巴里坤雖屬西北兩
路要地但現在烏魯木齊已設駐防兵丁巴里
坤又成內地烏魯木齊相距不遠屯田收穫有
餘臣等曾議將兵丁情願挈眷者准其同住安
西兵丁既與家口同行若於巴里坤留兵千餘
人餘俱移駐烏魯木齊情形尤便應行造房整
裝各事宜請交楊應琚安泰定長五吉劉順等

會商妥議具奏其巴里坤酌留安西兵及遣犯屯田之處俱應如所奏辦理再臣等前議移駐烏魯木齊挈眷兵丁將本營應得錢糧及鹽菜銀兩口糧等項全行支給至巴里坤官兵搭放青稞及所有馬匹夏秋出牧冬春飼秣等事亦請一并交議奏入

上從之

壬午

諭陝甘總督楊應琚辦理肅州遷移回人地畝

上諭軍機大臣曰楊應琚奏遷居吐魯番回人現已

自肅州起程出關沿途料理護送等語前據該督

奏將來回人起程後所遺熟地肅州民人俱願認

墾陞科經軍機大臣議覆令於回人起程後丈明

確數按則陞科該督此時自應遵照前奏確勘妥

辦其從前瓜州回人所遺熟地現在作何辦理之

處著一并查明具奏

甲申

議給哈密大臣關防

軍機大臣奏言據永寧奏哈密辦理軍務以來一切文移俱用總兵官關防今改副將駐劄關防亦須繳回請照巴里坤之例鑄給印信等語查巴里坤既給與管理官兵庫倫事務大臣印信請將哈密辦理糧餉事務大臣亦給與印信祇兼清漢篆文奏入報

聞

丙戌

飭諭哈密辦事侍郎永寧等籌辦補支錢糧錯謬

上諭軍機大臣曰阿桂等奏軍營官兵補領錢糧賞

項向俱行文哈密巴里坤查核支給今准永寧等

咨駐劄各處官兵補領錢糧均由本處支給在哈

密等處雖省查核之繁於官兵究無裨益已將伊

犂官兵應領之項仍照舊辦理咨覆永寧楊應琚

等語所奏甚是官兵補支錢糧俱由哈密等核給
既可省內地運解而所需什物即就便平價市買
更有益伊等生計若如永寧等所辦均由本處支
給先已多一運解之費且新疆物價昂貴伊等支
銀入手只顧目前轉致不能接濟是永寧等惟知
脫卸查核之責而於公事有益與否全未籌及况
辦理此事即變更成例亦當具奏乃徑行定議甚
屬錯謬著通行傳諭各處駐劄大臣所有官兵補

支錢糧仍照舊辦理並詢問永寧等令其明白回
奏

丁亥

烏什阿奇木阿卜都拉等捐助遷往伊犁回人
牲隻什物

命酌量獎賞如例

壬辰

諭參贊大臣舒赫德等辦理察噶爾等頭目入

覲

上諭軍機大臣曰舒赫德等奏察噶爾伯克之兄子
孟克薩爾巴噶什伯克之兄子雅木古爾齊俱願
隨布魯特明伊勒哈入覲並恭進馬匹請旨遵辦
等語孟克等輸忱入覲著准其來京所進馬匹如
果堪充上駟即遇便送京若本屬平常何必遠煩
人力即留於阿克蘇備用

參贊大臣舒赫德等疏奏酌定回城辦事人員

舒赫德等奏言臣等前將葉爾羌等處事務酌定成規具奏惟各城侍衛與司官筆帖式等官負未有定制謹會議葉爾羌喀什噶爾地大近邊阿克蘇回城總匯切近伊犁俱事務繁多擬設隨印辦事司官各一員筆帖式各二員專辦回人事務司官筆帖式各一員由陝甘同知通判內派出管糧官各一員庫車哈喇沙爾地當要路錢糧亦多擬設筆帖式各二員由陝甘縣

丞主簿內派出管糧官各一員烏什及喀什噶爾所屬之英噶薩爾葉爾羌所屬之和闐皆地僻事簡烏什酌設筆帖式一員餘城令該駐劄大臣等酌量派委具奏至卡倫牧羣及差務均需侍衛擬派葉爾羌喀什噶爾各十五員阿克蘇十員以上文武各員俱照例三年更換並准保舉議叙以示鼓勵如蒙

俞允臣等通行各駐劄大臣按照新舊日期畫一辦

理其侍衛等照例揀選引

見司官筆帖式等交軍機大臣揀選引

見派往奏入得

旨如所奏行

癸巳

葉爾羌茂特色卜伯克塔里卜以輪班入

覲中途病故

命賞治喪銀五十兩

乙未

阿克蘇阿奇木伯克色梯巴勒氏等捐助遷往伊犁回人牲隻什物

命酌量獎賞如例

九月丙申朔

命賞喀爾喀等應賠牛價之半

上諭軍機大臣曰成衮扎布等奏稱貝子品級公額爾克沙喇等選牛三千隻前往伊犁中途因時疫

倒斃一百八十八頭應著喀爾喀四部落賠補等語解送牛隻倒斃例應賠補但此次因時疫所致並非牧養疎忽著加恩將伊等應賠牛隻減半賞給價銀

已亥

命賞回人錫里卜阿三四品頂帶協辦沙雅爾事務上諭軍機大臣曰書山等奏稱沙雅爾回人錫里卜阿三曾任阿奇木伯克為霍集占所逐隨鄂對在

和闐守城拒賊今又協助參將繼善守備鄭國卿等辦送前往伊犁回人亦屬安協等語錫里卜阿三著加恩賞給四品頂帶協同阿奇木瑪哈默特辦事

辛丑

諭參贊大臣阿桂籌辦塔爾巴噶台駐兵屯田事宜上諭軍機大臣曰昨據阿桂議奏塔爾巴噶台等處駐兵事宜具見實心籌辦惟遷移都爾伯特扎哈

沁游牧一事不便允行前經巴蘭泰奏將都爾伯特部落遷於舊游牧之額爾齊斯續又內移未免紛擾今隨圍之該部落人等俱言現居烏蘭古木之地甚好生計較前富足可見伊等安土重遷巴蘭泰所奏殊屬未協至扎哈沁現在展拓卡倫游牧寬廣又將伊等遷於塔爾巴噶台必非所願雖此地竟置之間曠恐有哈薩克等越界游牧但前此越界之人一經發兵驅逐即已移回則是尚知

畏懼即暫不駐兵每年巡查一次有越界者照前
驅逐稍有違玩即收其所有以示懲戒諒可無虞
朕意塔爾巴噶台雖終須駐兵此時不必太速伊
犁官兵在外日久俟新兵更換後耕牧漸有積蓄
再行議及始為有益著軍機大臣議奏阿桂在軍
前日久今派明瑞領換班官兵至伊犁與阿桂交
代其伊犁事務俱照阿桂所定章程辦理阿桂來
京休息數年再往代明瑞此時塔爾巴噶台正可

駐兵屯田是此事始終皆阿桂之勞績矣伊既於
七月起程追捕塞卜騰並傳諭阿桂將現在情形
作速奏聞

諭定邊左副將軍成衮扎布籌辦科卜多駐兵屯田
事宜

上諭軍機大臣曰厄魯特回部蕩平烏里雅蘇台事
務較前甚簡雖有供應哈薩克來使及照管積貯
糧餉祇須酌留官兵不必多為駐劄至卡倫侍衛

前已減半今伊犁烏魯木齊各駐官兵亦應將此等侍衛撤回以省浮費現在該處所貯糧石雖多但不預籌接濟必又煩內地之力烏里雅蘇台雖不便屯田而科卜多向屬可耕之地若令成衮扎布仍駐劄烏里雅蘇台另派參贊大臣在科卜多屯田數年後將官兵移駐將來塔爾巴噶台額爾齊斯等處駐兵便成犄角之勢著傳諭成衮扎布等將烏里雅蘇台現在糧石若干足敷官兵若干

人之食或裁兵或折價又可省出若干可否全撤
卡倫侍衛及科卜多駐兵屯田之處詳議具奏

議安插羅卜淖爾回人事宜

參贊大臣舒赫德奏言尚書公阿里衮從前收
服羅卜淖爾回人未經查辦臣遵

旨行文德爾格等查得羅卜淖爾有兩部落一為喀
喇庫勒一為喀喇和卓喀喇和卓又分為五處
而喀喇庫勒僅一伯克約束難周請增一員協

辦喀喇和卓五處各一伯克不相統屬請派二
員總管二員協辦所有伊等屬人共一百八十
三戶一十七十一名口每年交納哈什翎百枝
海倫九張其喀喇庫勒伯克哈什哈請授為該
處總管伯克喀喇和卓五伯克內呢雅斯呼里
率先歸附伊帕勒人頗明白請授為喀喇和卓
五處總管伯克仍各管本處以二員協辦其三
處仍以舊伯克沙特瑞呢雅斯什克阿子納管

理伊等公舉之克什呼里阿爾蘇霍雅木巴勒氏俱授為協辦伯克就近派委又有素布爾格熟習道路請授為小伯克在吐魯番居住承辦賦役奏入得

旨軍機大臣議奏尋議從前阿里衮收服該部落回人時因軍務未竣暫歸額敏和卓管轄今回部蕩平各城俱添設伯克自應一體辦理舒赫德所奏喀喇庫勒喀喇和卓總管伯克三人應請

授為五品伯克其舊伯克三人及新補協辦伯克三人與承辦賦役之素布爾格俱授為六品伯克五品缺出由闡展大臣奏請補授六品缺出即行補授具奏所交常賦亦准其照前辦理奏入

上從之

甲辰

御前侍衛副都統安泰等疏奏交代起程各事宜

安泰等奏言更換臣等之旌額理阿思哈於七月二十八日抵烏魯木齊臣安泰臣定長將應辦事宜會同交代於八月二十日起程回京查烏魯木齊五村共屯田五萬三百餘畝計大小麥收成自八九分至十分以上約四萬五千九百石有奇又據厄魯特等報知昌吉產硝特訥格爾產磺隨飭配造火藥數百觔尚屬可用奏
入報

聞

壬子

申諭御前侍衛副都統安泰等會議駐兵事宜

上諭軍機大臣曰據安泰定長奏稱由烏魯木齊起程至喀喇和卓奉到會議遷移兵丁招徠戶口之旨復回烏魯木齊等語安泰等駐劄日久熟悉情形故令與旌額理等會議此外別無他事議定具奏後即行來京不必在彼守候

丙辰

命都爾伯特烏梁海等隨圍馬駝仍從官給

上諭軍機大臣曰成衮扎布等奏都爾伯特王策凌
烏巴什烏梁海內大臣察達克等呈稱伊等生計
近漸饒裕嗣後輪班隨圍情願自備馬駝扎哈沁
公扎木禪之子捫特什亦行呈請等語策凌烏巴
什等所請具見忱悃深屬可嘉但伊等生計較前
雖稍有起色未必饒裕若准其自備馬駝尚恐不

無拮据著傳諭成衮扎布等辦理都爾伯特烏梁
海扎哈沁人等輪班隨圍仍照前給與馬駝俟數
年後生計果足再如所請停止官辦仍將加恩伊
等之處曉示知之

已未

命更換伊犁等處領隊大臣

上諭軍機大臣曰都統豐安等駐劄新疆日久應派
員更換著派副都統鄂津前往伊犁更換豐安副

都統曹瑛更換豐訥亨副都統常岳前往喀什噶
爾更換富虎副都統素誠前往烏什更換永慶副
都統扎拉豐阿前往烏里雅蘇台更換扎隆阿副
都統雅朗阿更換福祿又

諭曰海崇阿現在病痊著以總兵官職御前往喀什
噶爾更換揚寧

議烏里雅蘇台馬匹撥解巴里坤事宜

定邊左副將軍成袞扎布奏言查烏里雅蘇台

有馬六千八百餘匹又喀爾喀四部落賠補官馬亦多現在需用處少請量撥四五千匹派官兵送至內地牧羣奏入得

旨軍機大臣議奏尋議烏里雅蘇台現在需馬無多自應通融撥解但內地牧羣馬亦足用現議派給八旗及聽直隸兵民購買惟來年往伊犁回部換班官兵應給馬匹巴里坤官馬六百餘匹尚不敷用應請將此項官馬量撥四五千匹送

往巴里坤交永寧等牧放備用程途既近調撥
最便奏入

上從之

辛酉

命官兵補領錢糧由大臣給照察核

上諭軍機大臣曰據永寧奏稱駐劄各處官兵應行
補領錢糧經總督楊應琚咨會各該大臣以哈密
無冊籍可稽不便據官兵等呈詞給發應由本處

支給今奉飭諭謹將緣由回奏請將官兵補領之
項令各該處造冊知會等語所辦亦是軍需關係
錢糧若無冊籍可稽僅據官兵呈稟即行支給必
致冒銷滋弊又費催迫之力公私俱屬不便嗣後
各該處大臣凡遇官兵補領錢糧務即出具印照
以備查核並著通行傳諭知之

壬戌

議入

覲回人馬駝停止官辦事宜

軍機大臣奏言查乾隆二十四年回人漠咱吧

爾入

覲回抵哈密經辦事大臣五吉給與官馬駝欵奉

諭旨申飭著賠還一半二十五年新柱等帶領布魯

特葉爾羌等處回人歸程因馱載牲隻不敷交

與永寧淑寶派員向回人取價代雇誠以回部

歸誠輪班來京之伯克等已成年例若每次官

給牲隻轉覺勞費應請嗣後每年入

覲回人若係賞物行裝牲隻不敷仍派員代辦至自
置什物則皆以原來馬駝馱載毋庸官為辦理
奏入

上從之

乙丑

議駐防屯田兵丁事宜

參贊大臣阿桂奏言塔爾巴噶台地居厄魯特

西北與俄羅斯哈薩克相近自應駐兵屯田查
臣等前議來年在瑪納斯等處安設林堡此次
換班兵丁將屆伊犁所有籽種口糧亦足擬於
癸未年二月初從伊犁派領隊大臣一員馬兵
五百名屯田兵三百名前往駐劄自輝邁拉呼
至都圖嶺設卡倫二十一所並遷移都爾伯特
扎哈沁等部落以壯聲援每年仍派兵巡查一
次至現在伊犁所獲糧石除支用外約餘萬石

可符軍機處原議駐兵五千請俟換班兵丁全到再行酌量派撥奏入得

旨軍機大臣議奏尋議阿桂所奏塔爾巴噶台駐防
欽奉

諭旨俟伊犁積蓄充裕再行辦理其遷移都爾伯特
等游牧亦遵

諭停止查伊犁及回城共有馬兵三千一百餘名綠
旗兵一萬二千餘名合計屯田之兵居其大半

應量為裁撤所餘地畝即召募回人耕種庶熟地不致荒蕪請交與永貴旌額里等籌議具奏至阿桂所奏伊犁駐兵三千名今既暫停塔爾巴噶台駐兵查伊犁現駐馬兵一千五百名酌增一千名葉爾羌等城共駐兵一千名烏魯木齊駐兵五百名擬派出京師滿洲兵二千黑龍江滿洲索倫兵一千察哈爾厄魯特兵一千前往更換其察哈爾及新舊厄魯特等有願挈眷

同來者聽此次換班兵丁僅係防守應照征戰之兵減半賞給滿洲兵二十人給馬二匹二人合給駝一隻仍行文甘肅哈密巴里坤烏魯木齊阿克蘇各大臣酌量接濟其阿桂奏請調取侍衛十五員查塔爾巴噶台尚未駐兵擬暫將卡倫侍衛十一員緩其派撥其餘四員請派大臣等揀選引

見亦文明瑞等帶往奏入得

旨葉爾羌有馬兵二百名即已足用著將新派之一
百名撥往伊犁其察哈爾厄魯特等兵著富德巴
圖濟爾噶爾馳驛前往揀選再此次換班兵丁行
走甚緩沿途宜加意牧養馬駝從前征戰兵丁馬
駝倒斃過多尚須賠補若伊等不知愛惜則是自
取罪戾著明瑞及領隊大臣通行傳諭官兵等知
之

平定準噶方略續編卷十三

欽定四庫全書

史部

平定準噶爾方略續編卷十四至
七

詳校官監察御史臣孫家賢

通政使司副使臣莫瞻菴覆勘

總校官進士臣

朱鈐

校對官修撰臣

戴衢亨

謄錄監生臣

蔣知蘆

欽定四庫全書

平定準噶爾方略續編卷十四

乾隆二十六年冬十月丁卯

阿克蘇辦事都統侍郎海明等疏奏建倉積穀事宜

海明等奏言據阿克蘇阿奇木伯克色梯巴勒氏等呈稱本年雨澤應時收穫豐裕但回人等不知撙節請將現收之穀公派五百石建倉積

貯以備賑貸俟積至五十石即停其派收庶儲
積益為充裕等語臣等伏思新疆積穀於回人
生計有益且出自伊等公請自應准行臣等仍
不時察核奏入報

聞

參贊大臣舒赫德等疏奏安插莽噶里克等所
屬回衆

舒赫德等奏言臣於九月十三日至闕展會同

德爾格查辦安插回人據吐魯番公素賚瑞呈
稱從前莽噶里克所管回人等及原住額林哈
畢爾噶之沙呼里烏默特所管回人俱係我父
額敏和卓暫管因吐魯番所屬不敷差遣是以
將此等回人均派其所借官穀亦一體支給今
回部平定自應分析安插等語臣等傳詢沙呼
里烏默特回人僉稱安插已久不願移往額林
哈畢爾噶其莽噶里克所管回人亦願照舊安

插臣等擬將莽噶里克屬人五百餘戶設四品伯克一員總管五品伯克二員協辦六品伯克五員分管其沙呼里等屬人七十四戶即以沙呼里為五品伯克總管烏默特為六品伯克協辦俱歸闡展大臣統轄奏入報

聞

御前侍衛副都統安泰等疏奏屯田兵民挈眷事宜
安泰等奏言臣等欽奉

諭旨將烏魯木齊屯田兵丁可否遷移家口之處查
奏伏查巴里坤地寒霜早若將屯田之兵移於
烏魯木齊甚為有益其現駐兵丁臣等詳加詢
問衆俱樂從惟請於收穫後回籍挈眷臣等擬
咨會楊應琚從安西等處按其程途遠近給與
車輛口糧於明年三四月前來再楊應琚有招
徠游民之舉俟送到時酌給地畝其口糧籽種
器具均須借給至起蓋房屋亦請官借銀兩令

其自營工作官為查核照水田例六年陞科其借給官項分年陸續扣還但不便與兵丁雜居應令於臣等駐劄相近之地安插奏入報

聞

己已

議科卜多駐兵屯田事宜

定邊左副將軍成衮扎布等奏言臣等欽奉

諭旨籌議移駐烏里雅蘇台兵丁在科卜多屯田查

烏里雅蘇台現有卡倫二十八處從前原駐侍衛以資防守今新疆平定應請各留台吉一員所有侍衛俱可撤回其屯田兵丁先派綠旗兵一百名官給籽種農具俟收穫後再將喀爾喀都爾伯特扎哈沁人等派往仍派喀爾喀兵一百名以備參贊大臣等差遣餘兵俱行撤回奏入得

旨軍機大臣議奏尋議酌減烏里雅蘇台兵丁以節

虛糜之費屯田科卜多以省糧運之繁成衮扎布等既經籌度情形應如所奏派叅贊大臣一員領綠旗兵一百名前往科卜多屯田領喀爾喀兵一百名以備差遣本年收穫後再將喀爾喀等揀選派往將來積貯日豐則烏里雅蘇台官兵俱可漸次移駐以展喀爾喀游牧與塔爾巴噶台額爾齊斯互為犄角至卡倫侍衛臣等原議暫裁其半俟來年全行裁撤但軍營侍衛

似應酌留數員以備差遣請於新到侍衛內揀
留四員餘俱撤回其各卡倫酌留台吉俟將來
再行定議奏入得

旨烏里雅蘇台既留侍衛四員著再留二員派往科
卜多以備參贊大臣差遣餘如所議行

參贊大臣阿桂疏奏辦理哈薩克越境游牧

阿桂奏言喀爾喀梅楞達什敦多卜等追嗎哈
沁被掠遇哈薩克游牧之彰固斯得釋復派兵

相助尚屬恭順但據達什敦多卜等告稱哈薩克等又來塔爾巴噶台之布庫什河游牧查去年伊柱領兵驅逐勒卜什等處游牧之哈薩克時因伊等隨即遷移是以未加懲創今復蹈故轍恐日久生玩擬俟搜勦嗎哈沁竣事領兵親往嚴行驅逐仍收其牲隻示罰如稍有支吾即將為首一二人拏赴伊犁其彰固斯等既經協助我兵應量加獎賞令其遷移奏入報

聞

左都御史永貴等疏奏霍罕額德格訥等處情形

永貴等奏言從前額德格訥之阿濟比等與霍罕額爾德尼伯克因搶掠貿易人等成釁臣舒赫德曾於霍罕使人額里卜密爾琿回部時諭令和好旋據額里卜密爾琿復來向噶岱默特告稱布魯特等又行阻截拏獲十人噶岱默特

查訊俱係樵採之人並未生事但去年霍罕曾
擅割額德格訥田禾額德格訥人等乘霍罕與
霍集雅特部落相攻搶掠報復又據額德格訥
阿濟比等使人額勒韜第懇請遣使往諭霍罕
臣等查額德格訥人等前見霍罕有事意圖僥
倖續因畏勢來求講解遂以理斥責曉示並檄
行霍罕隨令額里卜密爾琿與額勒韜第等同
回嚴飭各守疆界不得滋事伊等俱各聽從再

額爾德尼伯克從弟阿卜都爾璠與霍集雅特
之丕色勒伯克交通謀害額爾德尼事洩被殺
霍罕因攻霍集雅特丕色勒伯克迎敵額爾德
尼被圍有伊等兩部落之大阿琿講和暫已息
兵謹將前後情形及曉示文書恭呈

御覽奏入報

聞

癸酉

命酌辦伊斯拉木罪案仍曉示回人

上諭軍機大臣曰永貴等奏照管屯田回人伊斯拉木因回人台因和卓之妻辱詈起釁刺殺台因和卓并傷及其妻與弟不應引照回經出財抵罪應依鬪殺律擬絞等語伊斯拉木以兵刃鬪毆致有殺傷按律擬絞絞情罪允當但據奏稱伊從前隨副將軍富德在阿喇巴捉生始知將軍兆惠等堅守信息曾賞給翎頂而回經又有死者之家如願受

普爾一千騰格免其抵償等語著詢問死者親屬
情願與否如不願受財仍將伊斯拉木論抵此案
特因伊斯拉木稍有勞績是以格外加恩否則案
律定擬斷不姑寬仍曉示回衆知之

丙子

訓飭喀爾喀郡王車木楚克扎布等追捕塞卜騰不
力

上諭軍機大臣曰成衮扎布奏車木楚克扎布等報

稱領兵追捕嗎哈沁塞卜騰等於八月十九日在
和爾沁河尋踪前往二十五日抵額爾齊斯哨探
人等捉生詢問知塞卜騰等已入俄羅斯隨追至
俄羅斯之鏗格爾圖喇向瑪玉爾等索取據云塞
卜騰等男婦一百六十餘口投來已行文吉納爾
衙門俟回文到日再定等語塞卜騰等攜帶家口
行走若果速行追襲何至使入俄羅斯且俄羅斯
邊界並無城郭果直入搜捕自必弋獲車木楚克

扎布莽古賽辦理遲延甚屬錯謬著嚴行申飭賊
入既入俄羅斯天氣漸寒官兵不必久駐即回烏
里雅蘇台休息此次哨探行走之都爾伯特烏梁
海等捉生探信殊為出力都爾伯特貝勒巴桑著
賞給緞疋兵丁等俱酌量賞賜以示鼓勵

丁丑

命安置回人阿卜都賚於京師

軍機大臣奏言玉古爾阿奇木阿卜都賚因需

索多倫回人革職遵

旨解京今據納世通等派員解送前來查阿卜都賚
係庫爾勒回人散秩大臣伯克托克托之弟托
克托隨征庫車持檄往諭為逆賊等誘害因令
伊弟隨營効力續將多倫回人移居哈喇沙爾
以阿卜都賚為阿奇木管領又查從前海明等
解送掠奪商人之冲噶巴什烏默爾比來京蒙
恩旨賞給馬甲錢糧歸入回人佐領安插今阿卜都

齊應否按律治罪及照例安插之處伏候

欽定奏入得

旨阿卜都齊著照烏默爾比辦理

辛巳

葉爾羌辦事都統新柱等疏奏辦理錢法事宜
新柱等奏言據管理錢局同知圖桑阿等呈稱
上年九月初七日辦理鼓鑄錢文迄今一載以
錢五十文為一騰格計共八萬二百三十四騰

格除免給三城回人四萬三千九百九十八騰
格外仍存三萬六千二百三十五騰格查回人
免支普爾錢文近將七十之數增加三十富人
尚可支持貧戶頗形竭蹶嗣後應請從容調劑
不必勒限惟以盡收普爾錢文為止又鑄錢匠
役共九十九人所收普爾漸少請裁去一半以
節糜費奏入報

聞

丁亥

命獎賞追捕塞卜騰等之大臣官兵

上諭軍機大臣曰成衮扎布奏車木楚克扎布等呈稱俄羅斯鏗格爾圖喇瑪玉爾等奉伊吉納爾衙門來文將嗎哈沁塞卜騰等一百餘人及軍器馬匹等物全行送出等語車木楚克扎布等駐兵納林候俄羅斯信息曾經降旨訓飭今俄羅斯既行送出即已竣事塞卜騰雖係俄羅斯遵約呈獻非

伊等擒獲但遠道追捕亦與有勞績車木楚克扎
布莽古賚著加恩賞緞四端都爾伯特貝勒巴桑
烏梁海散秩大臣圖布慎領兵追捕喀爾喀協理
台吉恭格向俄羅斯索取頗屬出力俱著賞緞三
端此項派出官兵及都爾伯特烏梁海等官兵仍
酌量賞賜以示鼓勵塞卜騰著嚴行押解來京

戊子

諭陝甘總督楊應琚籌給青海游牧事宜

上諭軍機大臣曰前據多爾濟奏請將從前羅卜藏丹津游牧之洮賚郭勒等處給與青海扎薩克等游牧經理藩院議駁此等游牧係羅卜藏丹津舊地伊逃叛之後久已入官不應再給扎薩克等但念此時新疆展拓非舊日之比即酌給伊等游牧亦無不可惟是洮賚郭勒等處是否牧放官馬抑係向來閒曠之地無妨撥給著傳諭楊應琚令其籌度如尚可查給該扎薩克等即應酌辦不必過

於拘泥俟奏到再降諭旨

庚寅

諭參贊大臣阿桂便道投捕嗎哈沁

上諭軍機大臣曰成衮扎布等奏嗎哈沁塞卜騰等

供稱上年在齋爾地方見一起嗎哈沁踪跡沿途

住宿約安六竈向西行走或藏匿額林哈畢爾噶

山僻之處亦未可定已知會駐劄烏魯木齊大臣

等語著傳諭阿桂等俄羅斯已將塞卜騰送出無

庸搜捕可於回兵便道將塞卜騰所供賊人留意
查拏如不能弋獲即回伊犁辦事前據阿桂奏已
抵額爾齊斯其如何搜捕嗎哈沁之處一併奏聞

辛卯

陝甘總督楊應琚疏奏招募屯田戶口情形

楊應琚奏言臣前奉

諭旨招募內地無業游民屯田烏魯木齊隨就近飭
諭河西一帶據肅州安西二處招募貧民二百

戶約男婦大小三百名口定於本年十月分為
二起料理前往又肅州高臺縣招民五十六戶
肅州招民四十四戶共三百六十餘名口又山
西臨晉縣民盧文忠一戶五名口寄籍肅州貿
易情願自備資斧不敢煩官資送此外河西附
近一帶聞尚有數百戶情願挈眷前往而屯兵
之願攜家口者現在續行辦送其盧文忠頗知
急公仰懇賞給監生頂帶以示鼓勵奏入報

聞

十一月乙未朔

授原任副都統伊靈阿為藍翎侍衛

上諭軍機大臣曰原任副都統伊靈阿前因獲罪革職發往阿克蘇効力今據永貴等奏伊諳悉回部事宜請派往巴爾楚克管轄駐劄兵丁著加恩授為藍翎侍衛

辛丑

議辦送新疆挈眷兵丁事宜

理藩院尚書富德等奏言臣等查閱察哈爾兵丁及新舊厄魯特等尚可派出一千名効力新疆但此次係挈眷前往非換班兵丁可比應於次年三月起程派察哈爾總管副總管等官獲送其編設佐領支給馬駝賞給孽生牲隻整裝銀兩均照例辦理奏入得

旨軍機大臣議奏尋議臣等前議派出索倫官兵官

員預支俸銀一年兵丁賞整裝銀二十兩營長
等月支鹽菜銀六兩跟役六名馬十匹佐領等
月支鹽菜銀四兩跟役四名馬八匹驍騎校等
月支鹽菜銀二兩跟役二名馬六匹兵丁月支
鹽菜銀一兩五錢馬二匹每二兵公用跟役一
名月支鹽菜銀五錢賞銀二兩及帳房鑼鍋等
項今察哈爾安插官兵應照例辦理但伊等係
挈眷行走應請酌加整裝銀各十兩加給人口

各馬一匹駝一隻又按戶折給帳房銀四兩鑷
錫銀二兩其沿途支給口糧及選派官員護送
俱如所奏辦理至官兵馬駝向例於到營之日
交回此次應即行賞給俟立有產業時再將鹽
菜銀兩停止統計護送官兵需用銀六萬餘兩
從戶部關領又需馬二千八百餘匹在達里剛
愛商都達卜遜淖爾太僕寺牧羣內抽撥駝一
千隻行文西林郭勒盟長等將軍需餘駝揀送

如不足即令該總管巴爾品等於牧羣補給再
兵丁等既挈眷前往所有跟役賞項毋庸辦給
即為閒散餘丁等製備軍器之用奏入

上從之

丁未

訓諭左都御史永貴辦理回人事宜

上諭軍機大臣曰永貴奏稱回部伯克等往往腹削
所屬其奸徒又喜造言生事搖惑衆心請徧行曉

諭嗣後大小回人倘事有欺飾除按情定罪外量
其事體之輕重生計之貧富酌量罰取牲隻什物
歸公遇有廉謹之伯克頭目良善之回人加以獎
賞等語化導回人遷善改過有犯必懲自屬應行
之事若事有欺飾即定為罰項既非贖鍰之義不
過徒滋繁瑣耳且所罰牲隻什物或辦理不善致
有侵蝕反貽回人口實尤為非體總之辦理回衆
事務宜因其性情風俗而利導之非可盡以內地

之治治也即內地人等豈竟全無欺飾耶回人等
果係奸惡自當明正典刑不止罰贖若欺飾之事
安能保其必無惟應懲創者懲創之應約束者約
束之如謂區區牲畜什物遂可以賞善罰惡於政
體人情均不可行著傳諭永貴知之又

諭曰永貴奏請於伯克子弟及回人內視其人可造
就者酌量揀選學習辦事請賞戴金頂以示鼓勵
等語尚屬可行即照所請賞給

左都御史永貴等疏奏籌運回城入

貢方物事宜

永貴等奏言查葉爾羌喀什噶爾歲例各

貢葡萄一千觔本年五月起程僱覓回人牲隻送
至哈密約費一千餘兩其內地驛站不在此數
較之本價過多臣等酌議將此項運費購買騾
頭於應

貢金玉之時令派出官兵帶至哈密或於千觔內

揀選一二百觔入

貢餘者令回人按時價折交以為官兵鹽菜銀兩
之用奏入得

旨如所請行

辛亥

參贊大臣阿桂等疏奏驅逐越境游牧之哈薩
克情形

阿桂等奏言臣等聞自哈薩克脫出之厄魯特

等告稱哈薩克等又在塔爾巴噶台以內游牧
因領兵速往八月二十六日有哈薩克等在卡
倫外探知臣阿桂在營隨即投見詢係霍濟伯
爾根屬人因嚴行申飭令傳頭目來見次日見
游牧之哈薩克等拋棄什物連夜奔逃據厄魯
特等告稱伊等畏懼兵威臣慮其過於驚擾隨
追令轉回加以撫慰有彰固斯巴圖爾等三十
餘人先來服罪餘人俱陸續前來臣復分途查

勘越境之哈薩克等約二十餘戶已全行逐出
但伊等散處游牧惟貪小利雖據稱不敢再來
亦未可深信臣等仍不時巡查計駐兵設卡之
後自當斂跡奏入報

聞

壬子

諭烏魯木齊辦事副都統旌額理等辦理哈薩克買

易事宜

上諭軍機大臣曰安泰駐烏魯木齊二年每年辦理
哈薩克貿易數次本年自五月貿易後迄今未來
哈薩克等見小貪利若概從優渥則難乎為繼或
過示減省則遠人疑阻惟在大臣等悉心籌酌調
劑得宜今旌額理等接辦時宜加意體察固不可
刻覈以阻歸順之忱亦不可虛糜以啟覬覦之漸
總之內地貨物有餘而邊境馬匹最要化無用為
有用莫善於此但不可因朕此旨遂不知節制著

傳諭旌額理等悉心妥協辦理

議瑪納斯等處屯田事宜

御前侍衛副都統安泰等奏言查原議瑪納斯庫爾喀喇烏蘇晶河三處屯田共需綠旗兵八百名今按照兵數應派都司守備各一員千總三員把總六員其管理糧務查瑪納斯與羅克倫相近可令該處巡檢兼辦晶河等處派員辦理以范時綬駐劄三屯之中往來巡察其駐防瑪納

斯庫爾喀喇烏蘇由烏魯木齊派索倫兵各六
十名晶河由伊犁派索倫兵五十名屯田兵三
人給馬二匹駐防官兵之馬共需八百四十餘
匹馱載口糧籽種軍器農具需駝一千三百餘
隻恐有不足又製車一百輛以所換哈薩克馬
匹輓運所有官兵鹽菜銀兩瑪納斯等處由烏
魯木齊支領晶河由伊犁支領奏入得

旨軍機大臣議奏尋議臣等前議來年在瑪納斯等

處屯田酌派官兵及就近由伊犁烏魯木齊分
辦口糧籽種今范時綬駐劄辦事今安泰等所
奏派出屯田管糧各官及應行派辦駐防官兵
馬駝諸務俱係按照情形應如所奏辦理奏入
上從之

癸丑

命肅州鎮總兵五福署安西提督

上諭大學士曰據楊應琚奏安西提督劉順現在患

病尚須調理來歲移駐巴里坤請以肅州鎮總兵
五福署理提督印務等語劉順著暫行解任調理
安西提督印務即著五福署理並令帶兵移駐巴
里坤

命加賞阿奇木伯克鄂對等養廉

上諭軍機大臣曰前因回人舊習凡伯克等多賸削
所屬是以賞給各城阿奇木伯克等錢幣地畝及
供役之人俾得奉公自愛近聞葉爾羌伯克鄂對

喀什噶爾伯克噶岱默特等頗知守分無苛擾回
人之事深屬可嘉念伊等歸誠日久効力有年著
於官給六百騰格外再加二百以示鼓勵此次係
出自特恩不可援以為例

丙辰

命理藩院衙門承辦回部事務

上諭軍機大臣曰永貴等奏回部各城阿奇木等伯
克俱由辦事大臣給與印信執照開載職掌造冊

報明軍機處等語軍機處承辦頗多理藩院專理蒙古事務尚可無辦回部著將理藩院五司內派出司專辦回部事務其酌擬司名及應設官員數目承辦事宜該部詳悉定議具奏

命賞原任布政使傅靖職銜

上諭軍機大臣曰永貴等奏原任布政使傅靖在阿克蘇喀什噶爾効力贖罪頗知勤慎等語傅靖著加恩賞給七品筆帖式職銜

命賞試用參將新德原任遊擊白衣保等職銜

上諭軍機大臣曰據德爾格奏管理屯田試用參將新德原任遊擊白衣保在屯二年甚屬奮勉等語新德著加恩補授參將遇缺即補白衣保著賞給千總職銜

士戍

命哈密貝勒品級玉素富往代吐魯番郡王額敏和

卓

上諭軍機大臣曰前因額敏和卓王素富皆回部舊人若令伊等更替駐劄辦事於新疆有益去年王素富來京曾諭令在哈密休息年餘今額敏和卓當還吐魯番休息以王素富往代王素富著即整裝候此次入覲回人等還至哈密時即同護送之乾清門侍衛等帶領前往王素富至葉爾羌額敏和卓即回游牧候來年入覲回人等經過吐魯番時再同侍衛等來京王素富亦授為參贊大臣應

得公項照例支給伊子伊勒巴喇伊木看守游牧
著加恩賞戴孔雀翎

癸亥

葉爾羌辦事都統新柱等疏奏籌糶和闐餘糧
新柱等奏言查和闐回人所交乾隆二十四五
等年糧石除官兵支領外仍餘一萬四千四百
餘石臣等飭令丑達照時價出糶除糶過三千
六百餘石外仍有萬餘石存倉陳陳相因恐致

朽腐據阿奇木伯克阿什默特等呈稱回人每年交正項普爾二萬四千騰格每月復以普爾三千騰格換易新錢故官糧難於銷售若准以紬布牲隻作價尚可通融又所屬克勒底雅每年採金入

貢仍有贏餘亦可作價如蒙允准每年願認糶糧石一千八百帕特瑪等語臣等伏思回人紬布價值較糧石頗賤牲隻價雖稍昂仍減於內地

辦送金亦通行之物俱可濟用且伊犁布價甚貴若由臺站轉運於兵丁等衣服有益奏入得旨如所請行

議回城錢法事宜

軍機大臣奏言新柱等奏回人以普爾錢文兌換新錢不能全行交納又鑄錢工役過多請量減一半以節糜費等語欽奉

諭旨俟臣舒赫德到京時議奏臣等查葉爾羌鑄錢

一年共得八萬餘騰格阿克蘇又開局鼓鑄與舊普爾參雜行使但回人貧富遠近不同不能全收舊錢以足十萬騰格之數臣等愚見新舊錢參雜自可流通無庸急於收舊若新錢鑄至十萬騰格時舊錢收盡自當停鑄或尚有舊錢則仍行添鑄以盡收舊錢為度每月不限定數於回人生計有益至錢局所鑄無多其工役等自當裁減俱應如所奏辦理奏入

上從之

平定準噶爾方略續編卷十四